

## □गद्य-काव्य

### नुकती-दाणा

गोविंद अग्रवाल

#### कवि परिचै

गोविंद अग्रवाल राजस्थानी भासा री मुडिया लिपि रा देस रा नामी जाणकार हा। आपरौ जलम 17 अगस्त, 1922 नै होयौ। इतिहास, साहित्य अर लोक-संस्कृति विसय रा शोधकार्या में आप देस-विदेस रा केई शोधार्थीयां रौ मारग-दरसण कर्त्त्यौ। हिंदी अर राजस्थानी में लगोलग अर समरूप सिरजण कर्त्त्यौ। सन् 1960 सूं 1965 ताँई उणां इतिहास रा स्रोता, घटनावां, लोकगाथा, लोकगीतां अर लोकगाथा आद माथे 1500 पानां री प्रामाणिक अर तथ्यपरक सामग्री संकलित-संपादित करनै राजस्थानी सारू लूंठौ काम कर्त्त्यौ। आपरौ औं कारज राजस्थानी री लूंठी हेमाणी है। आपरी चावी-ठावी रचनावां में 'राजस्थानी लोककथावां', 'राजस्थानी कहावत कोश', 'राजस्थानी लोककथा कोश' (दो भाग) अर गद्यकाव्य री रचना 'नुकती-दाणा' प्रमुख है। श्री अग्रवाल राजस्थानी अर हिंदी री 21 पोथ्यां लिखी, जिणमें इतिहास अर लोक-साहित्य रौ वरणन, शोधपरक अर सरावणजोग है। 350 रै लगैटगै वांग शोधपत्र देस री ख्यातनांव पत्र-पत्रिकावां में छप्या। वै चूरू में 'नगरश्री' लोक-साहित्य संस्थान री थापना करी अर इण संस्थान सूं 'मरुश्री' नांव सूं 1971 सूं 1987 ताँई शोध-पत्रिका ई निकाळी, जिणरा केईक विसेसांक शोधार्थीयां सारू घणा महताऊ अर संग्रेजोग है।

#### पाठ परिचै

आधुनिक काल रै गद्य-साहित्य री विधावां में गद्य-काव्य घणी बाल्ही विधा है, जिणमें भाव पद्य रौ अर भासा गद्य री आवै। गद्य अर पद्य रौ सरीर अर आतमा जैड़ौ मेल है। राजस्थानी में गद्य-काव्य लिखणियां में डॉ. मनोहर शर्मा, ठा. रामसिंह, चन्द्रसिंह बिरकाळी, गोविंद अग्रवाल, कन्हैयालाल सेठिया अर नूंवा लिखारा में विक्रमसिंह चौहान खास है। गोविंद अग्रवाल री पोथी 'नुकती-दाणा' सूं कीं टाळ्वीं गद्य-कवितावां अठै लिरीजी है। नीति, दरसण अर वैवार रौ बोध कम सूं कम सबदां में घणै असरदार ढंग सूं होवै। घमंड अर सरलता, अमीरी अर गरीबी रौ भेद अर मिनख री दीठ में माया रै असर रौ बारीक चित्रण आं रचनावां में होयौ है।

### नुकती-दाणा

(1) माटी को दीवौ चिनो'क सो उजास देयनै भी आपकै काज़ल सूं आपकी बिड़दावळी भींत ऊपर मांडै, पण आखै जगत में परगास देवणियौ सूरज कदै इसी बात मन में ई को ल्यावै नीं।

(2) मालदारां का पग तौ माया कै नसै सूं धरती पर टिकै कोनी अर गरीब कै दो पगां नैं कठैई ठौड़ कोनी, जद पछै आ धरती क्यां जोगी है?

(3) पाणी सूं भस्योड़ै कुंडे में टिकाणै सूं सीधी अर निरजीव लकड़ी भी बांकी लखावै जणा माया सूं भस्योड़ै बखारां कै बिचालै रैवणिया मिनख सीधा कियां रैवै?

## गळगचिया

### कन्हैयालाल सेठिया

#### कवि परिचै

कवि कन्हैयालाल सेठिया रोज जलम सन् 1919 में चूरू जिले रै सुजानगढ कस्बे में होया। आपरी भणाई-लिखाई घरां ई होयी। ‘धरती धोरां री’ अर ‘पाथळ अर पीथळ’ जैड़ी लोकप्रिय रचनावां रा सिरजणहार स्व. सेठिया री राजस्थानी अर हिंदी में पचास सूं बेसी काव्य-पोथां छप्योड़ी। जनकवि रै रूप में सुविख्यात कन्हैयालाल सेठिया मायड़ भासा राजस्थानी रा साचा पुजारी, टकसाली भासा रा जाणकार हा। वां मोकठी आध्यात्मिक अर दार्शनिक कवितावां ई लिखी। भारतीय समाज अर लोकमानस नैं आपरी लेखनी रै विसै बणावण वाला स्व. सेठिया आधुनिक काळ रा मौलिक अर मौजीज कवि मानीजै। राजस्थानी में आपरी 13 काव्य-कृतियां छप्योड़ी हैं, जिणां में रमणिया रा सोरठा, मोंझर, कूंकूं, गळगचिया, लीलटांस, धर कूचां धर मजलां, मायड़ रै हेलो, सबद, सतवाणी, अघोरी काळ, दीठ, कक्को कोड रो अर लीक-लकोळ्या खास हैं।

आधुनिक राजस्थानी कविता में सेठिया जी ओक न्यारी-निकेवढी पिछाण राखै। ओक संतअर दारसनिक सरीखौ गैरौ चिंतन, सबदां री बारीक कारीगरी, मीठी रसभरी अभिव्यक्ति आपरै काव्य री विसेसतावां हैं। मिनखापणै री मरजादा, चरित्र रै ऊज़वौ पख, देस अर समाज रै सुधार री हूंस, प्रकृति अर राजस्थानी भासा री पीड़ आपरै काव्य में सांगोपांग ढंग सूं प्रगट होवै।

#### पाठ परिचै

कन्हैयालाल सेठिया री गद्य-काव्य पोथी ‘गळगचिया’ मांय सूं कीं टालवीं गद्य-कवितावां इण पाठ में लिरीजी है। औ कवितावां मिनख-मानखै री सावळ ओळखाण करावै। तांबै अर माटी रै घड़ै रै दाखलौ प्रेम, ग्यान अर अपणायत रै घणौ झीणौ अरथ प्रगट करै। कोयल अर काग रै मीठा अर खारा बोलां रै आपरै असर है। जेवड़ी मिनख री कुबुद्धि अर गैलपणै नैं चौड़ै करै, तौ घड़ौ परिपक्वता मांगै। नीमड़ौ अर मतीरै री बेल लुळणौ अर धरातळ सूं जुड़नै आगै बधण री साख भैर, तौ पानड़ै जैड़ा मिनख मूळ सूं टूटनै आगै बधै जरूर है पण क्यां जोगा ई नीं रैवै। मूळ सूं जुड़ाव जरूरी है। इण गद्यकाव्य री भासा आलंकारिक अर भाव गागर में सागर ज्यूं है।

## गळगचिया

(1) तांबै रै कळसौ माटी रै घड़ै नैं कैयौ, “घड़ा, थारै में घाल्योड़ौ पाणी ठंडौ कियां रैवै अर म्हारै में घाल्योड़ौ तातौ कियां हो ज्यावै ?” घड़ौ बोल्यौ, “म्हैं पाणी नैं म्हारै जीव में जग्यां दचूं हूं अर तूं आंतरै राखै, औ ही कारण है।

(2) रुंख रै पत्तां में लुक्योड़ी कोयलड़ी बोली, “कूहूऽ॑” मारग बैंवता बटाऊ निजर उठायनै बोल्या, “आ कठैक बोली ?” रुंख री ऊंचली टोखी पर बैठ्यौ कागलौ बोल्यौ, “कुरां॑ कुरां॒॑” पण कोई आंख उठायनै ई नीं देख्यौ।

(3) मिनख कैयौ, “उळझ्योड़ी जेवड़ी, म्हैं तनैं सुळझायनै कितौ उपगार करूं हूं।” जेवड़ी बोली, “तूं किस्योक उपगारी है जकौ म्हारै सूं छानौ कोनी। कोई और नैं उळझाणै खातर ई मनै सुळझातौ होसी।”

(4) कुम्हार काचै घडै नै चाक सूं उतारनै न्यावडै री उकळती भोभर में ल्या न्हाण्याँ। घडौ रोयनै बोल्यौ, “विधाता, आ कार्ड करो ?” कुम्हार हंसनै कैयौ, “पणिहारी रै सिर परां इयां सीधौ ही चढणौ चावै हौ के ?”

(5) नीमडै रो रुँख मतीरे री बेल नैं हंसनै कैयौं, “म्हारी टोखी तौ आभै नैं नावडै है अर तूं धूळ पर ही पसस्योडी पड़ी है ?” मतीरे री बेल बोली, “पैली थारै फल कानी देख, पछै म्हारै सूं बात करजै ।”

(6) पानडौ झरनै पाणी में पड़ग्यौ, ढूब्यौ कोनी, तिरण लागग्यौ। मन में फुलीजनै रुंख नै कैयौ, “म्हें किस्योक हुंस्यार तिराक हूं?” सिंध्या पड़तां ई रुंख कैयौ, “पानड़ा, ओकर अठीनै आईजै।” पण पानडौ रोवतौ सो बोल्यौ, “म्हारै सारै री बात कोनी।”

(7) पान पीळा पड़ता देखनै माळी रौ चैरौ पीळौ पड़ग्यौ, पण फल पीळा पड़ता देखनै माळी रै मूँडै पर ललाई आयगी।

॥ ॥  
अबखा सबदां रा अरथ

दीवौ=दीपक, दिवलौ। उजास=प्रकास, उजाल्लौ। बिडावली=जस रौ गीत। चिनोक=थोड़ोक, छोटोक। मालदार=धनी, अमीर। बांकी=टेढ़ी। कळसौ=तांबै रौ छोटौ मटकौ। तातौ=गरम। आंतरै=दूर। रुंख=पेड़। बटाऊ=राहगीर, पंथी। टोखी=ऊंची डाली। जेवड़ी=रससी। चाक=जिण माथै गीली माटी नैं कुंभार आकार देवै। भोभर=जगता खीरा रै ऊपरली गरम राख। ललाई=लालिमा, चैरै रौ चिल्कास। फूलीजनै=गरब सूं घमंड सूं।

## सवाल

## विकल्पाऊ पडृत्तर वाळा सवाल

1. पाठ में आयौ गद्य-काव्य गोविंद अग्रवाल रै किण संग्रे सूं संकलित है ?  
(अ) राजस्थानी लोककथावां      (ब) सीपी  
(स) वंदनमाळ                                (द) नुकती-दाणा

( )

2. कन्हैयालाल सेठिया री किण पोथी सूं गद्य-काव्य रा अंस लिरीज्या है ?  
(अ) लीलटांस                                (ब) मींझर  
(स) गळ्गच्चिया                                (द) अधोरी काळ

( )

3. माटी रौ दीयौ आपै काजळ सूं भींत माथै कांइ मांडै ?  
(अ) चित्राम                                        (ब) बिडदावली  
(स) मांडणा                                        (द) साखियौ

( )

4. मिनख जेवड़ी नैं क्यूं सुळझावै ?  
(अ) दूजै नैं उळझावण सारू            (ब) गाय बांधण सारू  
(स) मांचै री देवण सारू                    (द) चारै रौ भारौ बांधण सारू

( )

### **साव छोटा पढूत्तर वाला सवाल**

1. माझी रों चैरौं पीळौं क्यूं पडै?
2. कुम्हार काचै घडै नैं चाक सूं उतारनै कठै न्हाख्यौ?
3. किण रै पगां नैं धरती माथे ठौडै नॊं मिळै?
4. घडै में पाणी ठंडौ रैवण रों कांई कारण बताइज्यौ हैं?

### **छोटा पढूत्तर वाला सवाल**

1. पाणी रै कुंड में पड़ी लकड़ी किणरै प्रभाव रै कारण टेढी लखावै?
2. माटी रों दीयौ अर सूरज समाज में कैडा मिनखां रा प्रतीक हैं?
3. कोयल अर काग रै बहानै रचनाकार कांई बात कैवै?
4. गोविंद अग्रवाल कुणसी संस्था री थापना करी अर बठै सूं किसी शोध-पत्रिका निकाली?
5. कवि कन्हैयाला सेठिया री चार पोथ्यां रा नांव लिख्यौ।

### **लेखरूप पढूत्तर वाला सवाल**

1. “कन्हैयालाल सेठिया री पोथी ‘गळगचिया’ री गद्य कवितावां मिनख खातर मोटी सीख है।” इण कथन नैं सिद्ध करौ।
2. तांबे रै कळसै अर माटी रै घडै बाबत सेठियाजी रा विचार लिख्यौ।
3. गोविंद अग्रवाल रै गद्य-काव्य में आयोड़ा मूळ भावां नैं लिख्यौ।
4. कन्हैयालाल सेठिया रै गद्य-काव्य री मूळ भावना समझावौ।

### **नीचै दिरीज्या गद्यकाव्य अंसां री प्रसंगाऊ व्याख्या करौ।**

1. माटी को दीवौं चिनोंक सो उजास देयनै भी आपकै काजल सूं आपकी बिड़दावळी भींत ऊपर मांडे, पण आखै जगत में परगास देवणियौं सूरज कदै इसी बात मन में ई को ल्यावै नॊं।
2. पाणी सूं भर्योडै कुंड में टिकाणै सूं सीधी अर निरजीव लकड़ी भी बांकी लखावै जणा माया सूं भर्योडै बखारां कै बिचालै रैवणिया मिनख सीधा कियां रैवै?
3. मिनख कैयौं, “उळझ्योड़ी जेवड़ी, म्हें तनैं सुळझायनै कित्तौ उपगार करूं हूं।” जेवड़ी बोली, “तूं किस्योक उपगारी हैं जकौं म्हरै सूं छानौं कोनी। कोई और नैं उळझाणै खातर ई मनै सुळझातौं होसी।”
4. नीमडै रों रुँख मर्तीरै री बेल नैं हंसनै कैयौं, “म्हारी टोखी तौं आभै नैं नावडै हैं अर तूं धूळ पर ही पसर्योड़ी पड़ी है?” मर्तीरै री बेल बोली, “पैली थारै फळ कानी देख, पछै म्हरै सूं बात करजै।”